



Da la suprastanza cumünela

Dumandas da fabrica

La suprastanza aderischa a seguaintas dumandas :

- Vendita parcella nr. 825 i'l quartier « Resgia Chapella » contrat da cumprita Linard Luzi
- Barat da terrain traunter la vschinauncha politica, vschinauncha burgaisa, duonna Anna Regula Morf e sar Andreas Walter Flückiger, parcella nr. 454 e 455 a Cinuos-chel

Persunel

Illa Spia dal lügl 2018 es gnieu scrit our la piazza vacanta illa cumischiun da lavinas. Sün l'inserat s'haun annunzcho duos persunas. La suprastanza cumünela decida unanimamaing da tscherner a Roger Tremp scu nouv commember da la cumischiun da lavinas.

Nouv concept da scoula

Illa tschanteda dals 11.07.2018 ho la mnedra da scoula Elvira Püncher Bott preschanto ün nouv cocept da scoula a maun d'üna preschantaziun da Power Point. Zieva üna discusiun e diversas remarchas ho la mnedra aunch'üna vouta surelavuro il concept preschanto. Il böt da las lecziuns dad LII/TII (lecziun d'imprender individuela e temp d'imprender individuel) es dad adatter l'andamaint cullas lezchas/incumbenzas a la societad e las circumstanzas d'hozindi e que spordschand sper las lecziuns dad LII in scoula eir las lecziuns TII scu lecziuns da lezchas in scoula. Ils puncts cardinals da quist nouv concept da scoula sun ils seguanits : Il context per las lezchas in scoula ed a chesa s'ho müdo e's müda, equalited da schanzas, interess eterogens e cumpetenzas eterogenas dals respunsabels d'educaziun, effet different da las lezchas e sustegn da lezchas accompagnu (gratuit) scu soluziun. La fasa da quist proget cumainza cul nouv an da scoula e vo fin tar las vacanzas da Nadel.

OE S-chanf sböz da ledscha

La grupp da lavur OE S-chanf ho cun sustegn da l'advocat sar Fabrizio Visinoni e cul indschegner da forz'electric Arthur Brüniger elavuro üna pussibla fuorma da dret pel OE S-chanf scu eir ün artichel da constituziun art 59 fin., ed ün sböz d'üna ledscha. L'OE S-chanf dess gnir mno scu ditta publica dependenta. Scu basa leghela serva ün nouv artichel illa constituziun cumünela art. 59 fin. Per pudair realiser üna revisiun parciela inambel culla votaziun federela ils 29.09.2018 drouva que ouravant üna radunanza cumünela. Quella dess avoir lö in marculti, ils 29.08.2018. In occasiun da quella radunanza cumünela dess gnir preschanto per orientaziun la nouva ledscha dal OE S-chanf. Per trer üna decisiun sur da la nouva ledscha es previs üna radunanza cumünela in marculti, ils 24.10.2018.

Dumandas da contribuziun

La suprastanza cumünela aderischa seguanitas dumandas da contribuziun :

- La Diagonela 2019
- Club da skiunz Zuoz
- Corvatsch AG FIS World Cup e Freestyle-SM 2019
- La Tavolata 2018

Proget Marchapè Serlas

L'udcb sanescha l'an 2019 l'access „Serlas“ davent dal spartavias „Pradels“ fin circa tar'l tankedi parcella nr. 798. In quist connex es da sclarir giò la eventuela realisaziun da quist marchapè. Il

büro d'indschenger chi ho eir elvauro il proget da la via numneda dal chantun, ho inoltro a la vschinauncha ün'offerta correspudenta. La suprastanza cumünela ho decis da surder la lavur per quist proget a la firma Cparez indschegners our dal motiv, cha 'l büro Caprez fo già las lavuors d'indschenger pel Chantun per l'access « Selas » davent dal sparavias.

Büschen da protecziun rait d'electricited Serlas-San Güerg

Simon Salzgeber fabricha traunter Serlas ed il stabel da la Flab a San Güerg üna lingia da s-chudamaint per furnir energia da chalur. I'l concept da forza 2020 es planiso l'incablaziun da la lingia aviarta sün quist traget. La vschinauncha ho la pussibilted da depositer ün büschen da protecziun da cabels i'l s-chef da fabrica. Quist büschen po gnir druvo per metter aint cables electrics scu eir ils cables da LWL per la rait da fibra. Ils cuosts sun inclus i'l concept da forza 2020 e gnieu fat bun da la populaziun a la votaziun a l'urna ils 04.03.2018

S-chanf, 15 avuost 2018

La suprastanza cumünela